

鄒魯校訂
丘念台編

丘倉海先生念台詩集

寶之先生惠存

獨立出版社印行
廿六四十二
丘念台謹贈

鄒魯校訂
丘念台編

丘倉海先生念台詩集

獨立出版社
印行

丘倉海先生念台詩集序

余嘗謂氣節之爲物，如日月麗天，雖雲霧掩於一時，終能破晦擢瞿；且以此覘國家民族之興亡，亦屢不爽，國家民族有氣節，則其國家民族，雖一時危亡，卒能待時光復，故少康雖一成旅，可以中興，而申包胥七日哭秦，竟能復楚，歷稽史乘，信有徵也。昔韓之亡於日也，有安重根者，尙節不屈，手刃日相伊藤，其氣節凜然，韓人受其感動，志士紛起復國，經無數之艱辛，竟於此次世界大戰，日寇無條件投降後達其目的，第安氏慷慨捐軀，猶未若留未死之身，孕育後起革命，其心苦，其行難，不得已而洩之於詩者，此吾師丘倉海先生所以爲世崇拜而不已也。先生諱逢甲，字仙根，生

於台灣苗栗縣，幼負大志，博於學，尤深於詩，凌厲雄邁，其器宇志趣，流露詞句間，爲秀才時，人已知其以天下爲己任矣。台灣處大海中，周圍三千餘里，一望平原，物產殷富，明末鄭成功據之抗清，延有明一綫正朔垂三十年，清康熙間，始置郡縣，光緒時置行省，日人覬覦久矣。甲午之役，清廷巽懦，曲徇日人，割讓台灣，先生首創台灣自主，全台響應，鄭氏之流風餘澤未沫也。先生手草憲法，建台灣爲民主國，開議院，選總統，定官制，以藍地黃虎爲國旗，日軍來犯，推唐景崧劉永福分守台南北，先生自組義軍衛台中，台北陷，先生苦戰台中數月，援絕彈盡，先生伏榛莽中，思至台南與永福謀捲土，日軍大舉侵台南，索先生急，先生曰：「死易事也，吾將效曹沫復魯仇焉！」臨行賦離台詩六章以見志，台人至今猶吟誦不絕口，至於泣下，其感人有如此者。先生歸粵，築廬榜曰念台，命其子號亦曰念台，凡作

詩文，自署倉海君，取義於留侯見倉海君，得力士椎秦，以示不忘復仇復合，尤銳心教育，培植菁莪，同文學堂，韓江汀江數十兩等小學，皆所創辦，又相繼長廣府中學，兩廣高等方言學堂，喜羅致革命黨人爲職教員，故粵桂革命人士多出其門，廣東庚戌辛亥黃岡之役，新軍之役，三二九之役，尤極力以其地位，庇覆革命黨人，廣州光復，先生任組織南京臨時政府粵代表，參議院成立，被選爲議員，第國基初創，隱患交乘，先生竟憂憤死，遺言葬須南向，曰：「吾不忘台也。」先生處國破家亡之日，其強毅之氣節，復台之志願，與夫鬱伊無聊，一一托之於詩，故其蒼涼慷慨，有漁陽三搥之音，又如飛兔腰裏，奔放絕足，騰躍紙上，每一詩成，爭相傳誦，讀其詩可想見其南望鄉國於蒼煙暮靄中，獨愴然淚下之情景矣。魯於民國二十六年長中山大學時，曾梓其嶺雲海日樓詩抄，抗戰軍興，失地日廣，不屈之義民，抗戰之

將士，讀先生詩，恍如自本身心血中嘔出，故索先生詩者尤多，原集浩繁，久欲選集，以應求者，人事栗碌，卒未果，今抗戰勝利，台灣復歸祖國，適念今世兄因公來重慶，遂請其專集於台灣有關各詩百首，備出專集，選成，余顏之曰：「倉海先生念台詩集。」蓋先生念台之願已遂，地下有知，必掀髯吮毫而續元結中興頌矣。雖然，白雲蒼狗，世變滄桑，合浦珠還之日，應時懷勿忘在莒，則先生詩適足惕人也。故亟付梓，益以知詩之傳，匪清詞麗句，而在內蘊氣節，豈規規於推敲之末者，所可同日語耶？

民國三十四年十二月鄒魯序於重慶海屋。

丘倉海先生念台詩集

離臺詩六首（以下乙未作）

將行矣，草此數章，聊寫積憤，妹倩張君請珍藏之，十年之後，有心人重若拱璧矣。
海東遺民草。

宰相有權能割地。孤臣無力可回天。扁舟去作鷗夷子。回首河山意黯然。
虎韜豹略且收藏。休說承明執戟郎。至竟虬髯成底事。宮中一炬類咸陽。
捲土重來未可知。江山亦要偉人持。成名豎子知多少。海上誰來建義旗。
從此中原恐陸沈。東周積弱又於今。入山冷眼觀時局。荊棘銅駝感慨深。
英雄退步即神仙。火氣消除道德編。我不神仙聊劍俠。仇頭斬盡再昇天。
亂世團圓骨肉難。弟兄離別正心酸。奉親且作漁樵隱。到處名山可掛單。



丘倉海先生念台詩集

二

琮謹按：此詩乃公乙未夏將乘舟離台時，倚裝匆匆所作，民國十四年八月，琮遊台錄得者，原稿尙存親友家。

有書時事者爲贅其卷端

此局全輸莫認真。東南風急海揚塵。世間儻有虬髯客。未必扶餘別屬人。
人間成敗論英雄。野史荒唐恐未公。古柳斜陽圍坐聽。一時談笑付盲翁。

菊枕詩

昔游淨翠園。同賦菊枕詩。維時灌陽公。初出爲監司。兩遷遂持節。風雅照海湄。從容軍政暇。壇坫迭鼓旗。客並富才俊。主更雄文詞。秋光翦入卷。裏集名詩疇。苦心極鐫刻。謂可千秋垂。夷氛海上來。倚枕聞驚聲。是時菊正花。黃金甲紛披。秋風一場戰。應保危臺危。朱崖地遽棄。百計不得施。餘生脫虎口。寤寐空相思。昔爲稱意花。今作斷腸枝。兵火萬卷盡。梨棗災

可知。蠹篇縱幸存。零落生蛛絲。安知秋齋中。清芬猶昔時。寒宵有遠夢。相覓應天涯。

琮謹按：灌陽公，公師，唐景崧，廣西灌陽人。

天涯

天涯雁斷少書還。夢入虛無縹渺間。兵火餘生心易碎。愁人未老鬢先斑。沒蕃親故淪滄海。歸漢郎官遯故山。已分生離同死別。不堪揮涕說台灣。

夜聞早歸鳥鳴感

海氣濛濛生剗塵。鳥聲空度春風新。自從蕃漢斷消息。無限天涯淪落人。

次頌丞感懷韻

何勞珍藥寄當歸。養志萱堂願已違。回首樓台沈蜃氣。故山雖好事全非。

聯仙衡觀察元和懷古詩次韻答

剩水殘山夕照中。星旛無力禦東風。麻姑去後桑栽海。箕子歸來黍滿宮。縮地有人工幻術。鑒天何處效愚忠。與公欲話千秋恨。待剪衙齋燭淚紅。

次陳頤山見贈菊答之

讀罷新詩淚滿巾。乾坤蒼莽正風塵。五洲消息紛傳綫。萬里梯航競駕輪。朝議朱厓傷棄地。邊烽遼海厄歸人。相逢莫話流離感。未死終留報國身。

乙未除夕次頤臣韻

明日又新年。愁心隔海天。空山寒雨裏。相對不成眠。

愁雲（以下丙申丁酉作）

愁雲極目晝成陰。飛鳥猶知戀故林。破碎河山收戰氣。飄零身世損春心。封

侯未遂空投筆。結客無成枉散金。夢裏陳書仍痛哭。縱橫殘淚枕痕深。

送頌臣之臺灣

涕淚看離棹。河山息戰塵。故鄉成異域。歸客作行人。鯤海三更夢。鷗天萬里春。分明來路近。未信遽迷津。

此去仍鄉里。家山擁畫鞍。未頒新政令。猶見舊衣冠。落日鷗盟改。寒雲雁影單。相逢翻一笑。已作漢人看。

親友如相問。吾廬榜念臺。全輸非定局。已溺有燃灰。棄地原非策。呼天儻見哀。十年如未死。捲土定重來。

王氣中原在。英雄識所歸。爲言鄉父老。須記漢官儀。故國空禾黍。殘山少蕨薇。渡江論俊物。終屬舊烏衣。

預計君來路。榴花照眼中。山光仍故國。海氣滿征蓬。鰲背看紅日。鯤身靜黑風。洗塵尊酒在。收淚話瀛東。

重送頌臣

惻惻重惻惻。行人適異域。華夷忽易地。何處爲鄉國。車馬多離聲。川原帶行色。同來不同往。欲語涕沾臆。論交本世好。古誼吾所式。結髮論文字。廿載忘形迹。海氛忽東來。義憤不可抑。出君篋中符。時艱共戮力。書生忽戎裝。誓保台南北。當時好意氣。滅虜期可刻。何期漢公卿。師古多讓德。忽行割地議。志士氣爲塞。刺血三上書。呼天不得直。北垣遽中亂。滿地淆兵賊。此間非死所。能不變計亟。親在謀所安。况乃虜烽迫。乾坤已中變。萬怪競荒惑。人情易翻復。交舊成鬼賊。君亦挈家來。航海期不忒。得君意

中慰。歸粵途始即。卜居家再遷。山中事稼穡。與君此偕隱。山水况奇特。君言暫歸視。尙有舊廬室。來如潮有期。信在期不失。聞君言未畢。哀淚弗能拭。翹首滄海東。蒼波渺無極。昔時乾淨土。卵育長鯨匿。吾兄去秋往。三春阻消息。因君速歸駕。異類安可厭。願君信如雁。勿竟誓成鰥。歸途逼炎景。珍重慎眠食。到時常寄書。千里若門闕。書來君不來。累我常相憶。形影爲君單。語言爲君默。我欲從君往。天不假羽翼。時因西風夕。吹夢到君側。送君詩盈幅。難展腸結轡。詩成復自寫。不辨淚和墨。願君置懷袖。長鑑此悃悃。

琮謹按：交舊成鬼蜮，指部將呂某叛降倭事。

春愁

春愁難遣強看山。往事驚心淚欲潛。四百萬人同一哭。去年今日割台灣。

往事

往事何堪說。征衫血淚斑。龍歸天外雨。鰲沒海中山。銀燭塵詩罷。牙旂校獵還。不知成異域。夜夜夢台灣。

去歲秋初抵鮑江，今仍客遊至此，思之撫然。

淪落天涯氣自豪。故山東望海雲高。西風一掬哀時淚。流向秋江作怒濤。

秋懷

古戍斜陽斷角哀。望鄉何處築高台。沒蕃親故無消息。失路英雄有酒杯。入海江聲流夢去。抱城山色送秋來。天涯自灑看花淚。叢菊於今已兩開。菊恨蘭悲闕衆芳。天南牢落悵離羣。客愁竟夕憐江月。鄉夢千重隔嶺雲。長笛且吹新道調。短衣誰識故將軍。雄心消盡閒情在。四海無家獨賣文。

仙屏中丞見和前詩。感事述懷。疊韻奉答。

涼波渺渺粵江清。去國懷鄉此日情。簾下君平宜賣卜。酒邊同父尙論兵。上書曾隕孤臣淚。懷刺新投釣客名。一事告公同嘆息。不如蠡種是行成。

再疊前韻奉答仙屏中丞

無計消愁且買春。戴山鼇竟失三神。中原正統終存漢。絕代雄文豈美新。黃石別來書未熟。朱厓棄後夢難真。連天烽火秋風急。怕憶穿胸貫耳民。

答臺中友人（以下戊戌作）

極目風濤愴夢思。故山迢遞雁書遲。渡江文士成傖父。歸國降人謗義師。老淚縱橫匡甫策。雄心消耗稼軒詞。月明海上勞相憶。悽絕天涯共此時。

抱石申屠劇可憐。

台人有賈于泉者，聞台亂家亡，投萬安橋下而死。

一庵待死伴枯禪。

內渡後，有諸生爲僧。

湛身難

訴遺民苦。殉義誰彰故部賢。

謂部下吳、徐、姜丘，諸將領。

碧血縱埋非漢土。赤心不死尙

唐年。

台中義士尙奉中國正朔。

扁舟但益飄零感。過海何曾便是仙。歸來誰與話酸辛。

滿目茫茫劫後塵。末俗黷凌欺客戶。長官尊重薄流民。本無曠土容安插。難恃高文濟困貧。冷守平生心迹在。朝衫零落泣孤臣。

元夕無月

滿城燈市蕩春烟。寶月沉沉隔海天。看到六鰲仙有淚。神仙淪沒已三年。三年此夕月無光。明月多應在故鄉。欲向海天尋月去。五更飛夢渡鯤洋。鯤雲夢斷夜潮寒。佳節偏憐見月難。十二樓台春寂寂。滿身花露倚欄干。倚欄癡待月華來。萬斛春愁酒一杯。恨煞蠻雲遮隔住。東風無力爲吹開。

蠻雲黯黯海天昏。冷對春燈憶夢痕。今月縱明輸古月。更無人說奪崑崙。

得頌臣臺灣書却寄

故人消息隔鄉關。花發春城客思閒。一紙平安天外信。三年夢寐海中山。波濤道險魚難寄。城郭人非鶴未還。去日兒童今漸長。燈前都解問台灣。同洲况復是同文。太息鴻溝地竟分。尺籍已成新國土。短衣誰憶故將軍。刀環空約天邊月。樽酒愁吟日暮雲。猶喜強亞近開會。不須異域悵離羣。

對月書感

明月出滄海。我家滄海東。獨憐今夜月。猶與故鄉同。喪亂山河改。流亡邑里空。相思祇垂淚。顧影愧歸鴻。

次韻答王曉滄廣文

漫說曾驅十萬師。河湟收復竟無期。秋風老驥思千里。故國鷓鴣困一枝。醇酒悲涼公子淚。麻鞋奔走小臣詩。勞君尙記虬髯傳。心冷全輸此局棋。

憶舊述今次韻答曉滄見贈

莽莽乾坤歲又周。尊前人減舊風流。江山滿目都非昔。不待人言意始愁。哀絲豪竹負中年。棄甲南來異錦旋。十載風塵雙鬢雪。剪燈情話更悽然。涕淚何曾爲酒悲。干戈滿地愴離思。流亡南渡誰收恤。愁說江淮唱義時。冠裳全異昔時觀。籌保東藩力已殫。海上貢貂稀閒使。詔書行不到三韓。風雪關河有夢還。海天漠漠對孤鷗。暗香疏影寒溪月。萬樹梅花憶故山。

寒溪 在臺灣縣東溪山上，有予別廬曰樵隱，多梅花。

海國詩壇舊主盟。登臺坐對玉山清。斐亭鐘絕風流散。落日寒蕪赤嵌城。
斐亭，在臺灣道署，爲昔與灌陽中丞偕賓客賦詩地，中丞句云千秋高會斐亭鐘是也。
熱血填胸鬱不涼。騎麟披髮走南荒。未酬戎馬書生志。依舊吾廬榜自強。

自強不息，爲予舊齋額，今擬重書以自勵。

行蹤曾爲荔枝留。琴劍西風記昔游。獨上朝台弔斜日。短衣匹馬過南州。
墜歡重續鳳城西。坐久長河影漸低。話到家山約偕隱。扁舟釣月老梅溪。
東南閒說未縶弓。對酒豪情與昔同。畢竟盧龍不會賣。田疇賓客在無終。

琮謹按：玉山，在台灣嘉義縣東北，三峯並列，人迹罕至，終歲雪封，爲台島最高

山，倭占台後，更名新高山，赤嵌城，在台南安平縣，荷蘭人所建。

聞海客談澎湖事

全臺門戶此荒礁。三載前仍隸大朝。斗絕勢成孤注立。交爭禍每彈丸招。尙

書墓道蠻雲暗。大令文章剗火燒。我爲遺民重痛哭。東風吹淚盜春潮。
絕島周星兩受兵。可憐蠻觸迭紛爭。春風血漲珊瑚海。夜月磷飛牡蠣城。故
帥拜泉留并記。孤臣掀案哭雷聲。不堪重話平臺事。西嶼殘霞愴客情。

寄懷維師桂林

百疏哀陳阻九閫。東南形勢繫鯤洋。留黔臣敢希莊躡。守絳民思磔犇昌。計
竭樞秦全上黨。力圖載晉等前涼。千秋成敗憑誰論。回首臺山淚萬行。

和曉滄買犢

平生慕馬援。邊郡事田牧。此志苦不成。牛後隨人逐。我家東海東。棄置委
荒服。田間舊牛宮。羣夷酣食宿。誅求遍雞豚。何況牛大畜。田家苦此累。
不令特養犢。惟昔大牢公。實致維州覆。彼哉伊何人。得毋乃其族。遺民痛

貽禍。恨欲食其肉。至今亂未已。東望爲痛哭。何時得伏波。重使交趾復。
我歸耕我田。漢書牛背讀。

和平里行有序（以下已亥作）

和平里三字碑，爲文丞相書，潮中志乘罕有載者。潮陽縣志云：景炎三年十月，文丞相率師駐潮陽之和平里，討叛將劉興，陳懿，懿敗走，擒興戮於和平之市。按此，即公集杜詩序所謂稍平羣盜，人心翕然時也。興懿故劇盜，歸正復叛降元者，故公詩序及史皆書曰盜，從其朔也。志曰叛將，定其後罪也。惟志以爲景炎三年十月，則誤。應從史作祥興元年。是年五月已改元，十月不得復繫景炎，志蓋誤以明年方改元也。是役也，鄒淵，劉子俊，兵皆會，潮中人士亦多效忠赴義者，故曰人心翕

然也。逆懿已走，遂引元師襲公，於是有五坡嶺之役。志云十二月二十日，與通鑑云閏十一月者不合，然事較詳。志云，時公吞腦子不死，復還潮陽見張宏正於和平里，大罵求死，不得，越七日，始見張宏範，不屈，宏範客禮之，時爲歲除前三日。祥興二年春正月，公遂發潮陽，陳懿後爲其子所殺云。謹按。公駐潮陽。於雙忠祠。蓮花峯外。事蹟則和平里爲多，里中今有文忠過化坊，卽爲公作者，其先後駐此當較久。宜其得爲里人作此書。縣志則永樂，景泰，成化，宏治四志均佚。今志則云里舊名蠓墩，公始易今名。碑未載。又云，公在軍常不寐。至此始安寢信宿，以地氣和平，故名之。則父老傳聞，恐非公當時意。此與里人所云鏐公書於碑，樹之里門，蠓遂徙去者，意皆非事實。蟲介舊有今無者，亦事之常。蠓非鱷比，徙何爲者，但里人以此增重公書，與韓公作

比例，意亦良厚，可姑存其說耳。書法厚重奇偉，非公不能作，審爲真蹟。碑連龜趺約高九尺許，大字三，曰和平里，每字高二尺許。小字九，曰宋廬陵文山文天祥題，每字二寸許。碑陰亦有字，漫滅不可辨。

光緒己亥春二月，逢甲來潮陽，過斯里拜觀焉。謹賦長句，傳之以告後人之憑弔忠節，與志潮中金石者。

蓮花峯頭望帝舟。雙忠祠前吟古愁。日星河岳浩然氣。大筆更向螭墩留。里人敬忠實遺字。未入南中金石志。我來下馬讀殘碑。弔古茫茫滿襟淚。三閩四廣何蒼黃。胡塵上掩天無光。力支殘局賴丞相。間關萬里來潮陽。雙髻峯高練江曲。長槁小市駐行轡。破碎河山小補完。警枕中宵睡初熟。於時人心方翕然。盜魁擒馘尸軍前。四方響應大和會。祥興天子平胡年。里改今名定斯義。豈爲南中好天氣。幕府流離半死生。可惜無人述公意。更取千秋名鎮

名。軍中鳳叔爲留銘。千秋鎮銘，鄒鳳作，鎮舊屬潮陽。當時赤手扶天意。誓欲界勿東南傾。

五坡嶺邊鼓聲死。丞相北行殘局已。復壁猶藏痛哭人。此邑民原多義士。

五坡之敗，謝泉羽匿潮陽民間。東山誰築丞相祠。英風如見提師時。手酌睢陽守臣酒。口吟杜

陵野老詩。殘臺便祝和平福。自爲里人書此幅。墨瀋淋漓玉帶生。鐫上穹碑

石痕綠。屢經刮火碑難燒。碑趺最屬臨虹橋。虹橋，今名和平橋，宣和間僧大峯築。江流橋下天

水碧。行客能言炎宋朝。大峯北宋公南宋。淒涼君國彌增慟。此橋曾過勤王

師。斜日寒潮滿橋洞。魯戈迴日難中天。潮生潮落穹碑前。粵潮有信杭無

信。空嗟三日簽降箋。南來未盡支天策。碧血丹心留片石。壯哉里門有此觀。

大書三字碑七尺。字高二尺奇而雄。筆力直迫顏魯公。旁書九字廬陵某。過

者千古懷孤忠。碑陰何人識何語。詢之里人不能舉。獨有公書永不磨。卓立

四朝閱風雨。螭何爲者避公書。帖然徙去如鱷魚。爾雖么麼識忠義。愧彼賣

國降虜奴。安得石闌周四角。上覆以亭備棲桷。公書縱道神物護。亦恐年深或斑剝。平生我忝忠義人。宋史詔牧卹流散忠義人，謂江淮來歸國者。浪萍還剩浮沉身。壺盧墩畔

思故里。壺盧墩在台灣縣北，近予故居。義師散盡衰孤臣。凌風樓臺爲公弔。嘉應，故梅州，有凌風樓爲公作，予

丙申過此，有弔公詩。振華樓頭夢公召。丁酉夏，在韓山書院，夢見公，振華樓書院中樓也。眼前突兀見公書。古道

居然顏色照。斗牛下瞰風雲扶。願打千本歸臨摹。何時和平真慰願。五洲一統胡塵無。

琮謹按：雙髻山，卽曾山，在潮陽縣西二十里，雙峯並峙。練江，在潮陽縣南，源出雲落山，東入海。

寄懷謝四頌臣臺灣

獨聽荒鷄夜。天涯憶故人。煙霞仍痼疾。雷雨負經綸。夢寐孤燈影。文章斷

髮身。相思隔滄海。極目歎揚塵。

文武新茶火。君臣舊藥籠。泉香乖昔嗜。方古誤書窮。索醉歸謀婦。佯癡近作翁。信陵醇酒意。潦倒幾英雄。

秋水芙蓉國。斜陽燕子家。青衫封敝籠。紅燭賞殘花。歷刼多情在。尋春故約差。壺盧墩畔月。冷照舊琵琶。

遙憶登臨處。今應付臥游。吹雲孤笛夜。落月萬象秋。掛壁輿圖改。尋碑屐齒留。年來腰脚健。還似舊時不。

柳汀贈詩述及臺事，疊韻答之

東海餓蛟作人舞。萬里礮雲挾槍雨。相公款關奉盟語。玉斧一揮恨終古。天南流落忠義人。披髮呼天天不春。臣軍請纓雲請劍。疏草刼燼餘吟身。傷心

豈獨士不遇，涕淚花前吟贈句。婦人醇酒足此生。老天不喜英雄氣。

琮謹按：莊柳汀，名學忠，江蘇人，孝廉。

夏夜與季平蕭氏臺聽濤追話舊事作

大海驚濤似昔時。高臺同聽不勝悲。五年鄉淚愁中制。半夜軍聲夢裏馳。鐵弩何時開越國。素車終古走靈胥。如聞鹿耳鯤身畔。毅魄三更哭義旂。

春感，次許蘊伯大令韻

一夜東風滿鳳城。春愁黯黯共愁生。新年鶯燕他鄉感。落日鯨鯢故國情。款局有人通秀吉。殘疆無計守延平。天涯何限哀時淚。灑向花前月不明。浮雲飛絮澹春前。夢憶蠨臣籲九天。照海旌旗忠義社。渡江帆楫永嘉年。遺殃箕子明夷地。并割顏回負郭田。獨對東風倍惆悵。故山回首鬱愁煙。

沉鬱雄心苦未灰。他年捲土儼重來。愁人斷句悲青坂。戰地殘槍臥綠苔。夢裏國讐慚越報。眼前兒戲感吳歎。故知塊壘澆難盡。且爲看花借酒杯。濛濛海氣遍東西。何日天戈許再提。華表空聞丁鶴語。亂萌先兆子規啼。飲河腹瀟千年濁。問道心驚七聖迷。五載傷春復傷別。懺除綺語未重題。

東山感秋詞、次康步屋中翰題壁韻 八月初六夜作

痛哭秋風又一年。觚稜夢落練紅天。拾遺冷作諸侯客。袍笏空山拜杜鵑。天涯心逐白雲飛。瑟瑟秋蘆點客衣。回首大宛山上月。更無緘札問當歸。

先母墓在大宛山。

斜日江聲走急灘。殘棋別墅局方難。後堂那有閒絲竹。陶寫東山老謝安。寒蛟海上趁人來。漠漠秋塵掃不開。滿目桑田清淺水。五雲樓閣失蓬萊。

冷落山齋運甕身。天門八翼夢無因。西風吹起神州恨。塵尾清談大有神。

琮謹按：東山，在潮陽縣東三里，綿亘六十里；練江，在潮陽南，源出雲落山，東入海。

劉慧君少拔。十年舊友曾從余。義軍內渡寓漳來。潮見訪賦贈。
義旂風捲海東雲。零落登壇十萬軍。幕府昔曾驚杜牧。名場久已重劉蕡。
青山故國餘哀涕。黃葉清秋下夕曛。閒煞鈴韜無用處。可憐尊酒更論文。

題蘭史獨立圖

舉國睡中呼不起。先生高處畫能傳。黃人尙昧合羣理。詩界差存自主權。胸
有千秋衰古月。眼窮九點哭齊煙。與君同此蒼茫况。隔海相望更惘然。
予亦有獨立圖。

寄題永井完久夢哉空也樓。新竹

完久，日本人，屢乞菽園索題，爲賦此寄之。

新竹乃吾舊游地。滄桑轉眼餘哀淚。誰知更有能詩人。五指峯邊吟古春。丈夫讀書兼讀律。致君堯舜乃有術。君今挾律游諸侯。高築夢哉空也樓。十二年一夢耳。皇王帝霸誰長留。信知大空本無物。得者勿喜失勿憂。海風吹客高樓頭。戰場寂寂黃花秋。人民城郭縱非故。終見仙鶴歸來游。

琮謹按：新竹，縣名，在台灣省台北府。

鷄籠金

鷄籠山畔陳雲陰。辛枯披沙一水深。寶藏尙存三易主。人間真有不祥金。

有感書贈義軍舊書記

拜將壇高卓義旗。五洲睽目屬雄師。當時力保危臺意。只有軍前壯士知。

宰相有權能割地。孤臣無力可回天。別台舊記啼鵲喚起東都夢。沈鬱風雲已五年。

鳳凰臺上望鄉關。地老天荒故將閒。自寫鄂王詞在壁。從頭整頓舊河山。誰能赤手斬長鯨。不愧英雄傳裏名。撐起東南天半壁。人間還有鄭延平。

琮謹按：東都，鄭成功入台灣，立承天府，號東都。

林篋雲郎中鶴年寄題蠓墩忠蹟詩冊。追憶舊事。次韻遙答

（以下庚子作）

筆端浩氣滿乾坤。桑海歸來義憤存。碎破河山同感慨。更將忠蹟表蠓墩。當時痛哭割臺灣。未肯金牌奉詔還。倉葛哀呼竟何補。全軍難保武巒山。

方君參其太僕團防軍事時，予總統全臺各路義軍，割臺之役，太僕倉卒內渡，予獨抗議保臺，卒乃轉戰支離，無成而去，武巒山在臺中。

英雄愧說鄭延平。目斷殘山一角青。何日天戈竟東指。誓師海上更留銘。

保臺之舉，日人平山氏比予爲鄭成功，可愧也。海上誓師，朱子磨崖字，或以爲鄭有臺識云。

黯黯歸雲擁海槎。浪紆籌策事量沙。島中義士依然在。伏臘年年奉漢家。

鮐江喜晤許韞伯大令

崎嶇臺邊話故晨。天涯五見異鄉春。相逢嶺嶠投荒地。同是江淮唱義人。筆下雄文消鱷氣。匣中長劍祕龍身。愁看清淺蓬萊水。滿目茫茫碧海塵。

將之南洋留別親友

五載金城客閉門。拍天海氣晝昏昏。九邊田牧思班壹。二帝遨遊笑馬援。地陷東南浮大島。天留豪傑救中原。撫髀漫下英雄淚。新野應容一旅屯。

答敬南見贈次原韻

世無倉海君。誰發誅秦意。一擊天下驚。奮起龍虎氣。

病中贈王桂山

所須藥物是當歸。有客南天歎式微。未報國讐心未了。枕戈重與賦無衣。

四月十六夜東山與臺客話月

（以下辛丑壬寅作）

萬事應教付酒杯。眼看雲合又雲開。中天月色雨餘好。大海潮聲風送來。人物祇今思故國。江山從古屬雄才。飄零剩有鄉心在。夜半騎鯨夢渡臺。

王曉滄將之官閩中賦別

鼓山東望龍渡處。海雨曾飄開國旗。從古英雄論成敗。不堪重話共和時。

次韻再答賓南。兼寄陳伯嚴

故鄉投足向何門。丁水南來遶古村。華表鶴歸山月暗。神州鰲沒海濤喧。競爭世界憐天演。寥落中原愴國魂。手把英雄傳閒讀。眼中多少可兒存。

與頌丞話臺事

萬三千尺出海面。島國諸山無此高。誰遣黃圖易他色。空傳赤制屬吾曹。夢中雄鬼哀相弔。劫後頑仙笑獨逃。收拾磨厓紀功筆。東南風急送春濤。

送謝四東歸

故人訪我東海來。春風萬里心顏開。故人別我東海去。臨歧各短英雄氣。七年不見今再見。滄海桑田事萬變。中間不變故人心。袖手海天看龍戰。君來

一月無停車。訪我更訪山中廬。老親喜君送君出。來此十日相同居。七年乃有此十日。但覺日行比常疾。此日不爲君我留。南風日日摧行舟。舟行既速兄有輪。輪轉四海揚胡塵。送君此去作胡語。樂府休唱胡無人。我年方強君未老。惜君投身隱海島。亞洲大陸局日新。時勢逕待英雄造。海山之高一萬三千尺。當年棄去良可惜。橫來不王復不侯。爲我歸言島中客。包胥存楚約可尋。廉頗用趙原初心。相期亞陸風雲再相見。騎鯨東海來挽神州沈。

次韻答維卿師

流落天南今八載。接天海氣晝昏昏。錦抱銀燭追前夢。夜半濤聲倍斷魂。空存扶漢分章手。無計能開日月昏。獨立蒼茫發遐想。自由鐘起國民魂。

寄臺灣樸社諸子兼懷頌臣

柏莊誰拾燹餘文。樸社重張劫後軍。九十九峯依舊好。畫搗豪筆寫秋雲。

題菊花詩卷

(以下癸卯甲辰作)

百尺澄臺對落暉。舊吟花處地都非。重尋十七年前夢。飄盡黃金淚滿衣。

題蘭史香海填詞圖

南宋國衰詞自盛。各拋心力鬥清新。零丁洋畔行吟地。又見江山坐付人。
此是本朝初割地。年來見慣已相忘。重吟整頓乾坤句。誰更雄心似鄂王。

題滄海道民臺陽詩話

(以下乙巳丙午丁未作)

如此江山竟付人。干戈留得苦吟身。亂雲殘島開詩境。落日荒原泣鬼隣。

堪碧可憐黃帝裔。受青誰作素王臣。請將風雅傳忠義。斑管重回故國春。

秋懷

斜陽圍聽說場詞。我亦曾驅十萬師。破碎河山開國史。飄零風雨出軍詩。海中故部沈蒼兕。雲裏殘旌失素蜺。歲自周天天自醉。紅牆銀漢隔秋思。雨年年鄉夢阻歸鞍。恨不隨風化羽翰。捲土重來心未已。移山自當事非難。雨餘瑋瑋潮初落。月下珊瑚島漸寬。地老天荒留此誓。義旂東指戰雲寒。

席上作（以下戊申作）

兒女英雄海上緣。東風吹散化春烟。相逢欲灑青衫淚。已割蓬萊十四年。

題崧甫弟遺像

三歲識四聲。七歲能文章。十三冠童軍。英聲震文場。平生性沈鬱。雅不樂

襮彰。宅躬已高潔。治事尤精詳。奮起佐義師。大節何慷慨。中日事起，弟奉檄辦理全台義軍

營務處先憂後樂志未遂。眼看海化田栽桑。眇眇一秀才。詔令僑海陽。歸粵爲海陽學

廩生，由許中丞奏奉旨蘆中之人信窮士。國仇家憤何能忘。吹簫不爲吳市乞。卜隣石

戶同農忙，山中千樹樹，澤中千足羊。無聊聊讀貨殖傳。更用陶朱公策施之商。

弟在台以蘆中人賦受知唐中丞，以貨殖傳書後文，受知劉中丞其先憂後樂賦，組織全以宋史事，尤爲顧方伯激賞，傳誦一時，歸潮則以擬范蠡致文種書受知張尙書，自丁酉後弟往

來潮嘉間，兼事農商。人生患難思骨肉。况乃兄弟非尋常。少爲失母雛。出入相扶將。

先母陳恭人見背，弟七歲，予方十六。以父爲之師。讀書同一堂。予與弟皆未更他師雙峯之山何峨峨。

大甲之水何湯湯。瑞蓮王子池。古柏大部莊。何須風雨夕。始復思聯床。

雙峯，在苗栗縣之銅鑼灣，予與弟皆生其地，大甲溪，逕東勢闊而出，祖宅在焉，瑞蓮堂，在王子社舊居，乙酉丁亥間，池蓮屢有並蒂者，柏莊，在大部處新居，皆台灣縣地。

此情此境曾幾日。君年且壯予且強。渡江忠義人。俗口誦曰倫。方同籌畫宇

宙分內事。將飛斂翼聊徜徉。三豕渡河歲云暮。送君韓江江上風帆張。誰知此別遂永訣。至今每過淚灑江亭旁。春風吹客忽出海。豈復再覓扶餘王。臨行不得一握手。心有萬緒誰度量。三書海外竟絕筆。語語直摯尤心傷。

己亥冬，同畫定嶺東同文學堂事，弟遂歸鎮平山居，余送之潮州上水門外，庚子春，予以學堂籌款事出南洋羣島，待弟不來，遂行，在新洲得弟信者三。

憂患焚如抑何亟。滿腔熱血冰難涼。丈夫死牖下。恨不爲國殤。是時乾坤正翻覆。目不忍視能無盲。飄然撒手不姑待。南溟有客方歸航。聞喪復聞亂。百感增茫茫。誰爲賦大招。返魂終無香。魂來夜黑曉得耗。信知夢寐非荒唐。登墳一哭千古慟。空山轉眼今幾霜。渡臺船鉞指辰巽。山中墳向如其方。化爲黃鶴有羽翼。東南飛定還吾鄉。黃鶴能言反平復。天荒地老此恨終須償。安能浪信人言已成佛。弟生有佛微，家人夢中亦見弟言已還佛位。幻視世界無興亡。佛言我

相即非相。此圖何乃神揚揚。每見此圖在。不信其人亡。其才未展肆。其貌非老蒼。豐其智能。齎其壽。生才何意。吾直疑彼倉。神龜不可呼。安得叩九閭。吾家世忠孝。卜者言將昌。不于其身于其子。丹山已見雙鳳皇。益之一鳳雛。三鳳方翱翔。視此圖中人。前輝而後光。題圖者誰爲。乃兄義師故帥虞曹郎。

題凌孟徵天空海濶詩鈔。並答所問臺灣事

多君欲問臺灣事。曾作大將軍現身。滿目劫塵無法說。青天碧海哭詩人。牙旗獵獵捲東風。舊事眞成一夢中。自有千秋詩史在。任人或敗論英雄。

重陽夕作

蕭蕭風葉轉迴廊。耿耿星河夜未央。十載龍吟雙劍隱。五更蟲語一燈涼。愁

邊澤國飛鴻雁。夢裏家山臥犬羊。遙憶黃花吾負汝。故園今日是重陽。

吳穎芝太守蔭培過訪兼示守鹿氏事詩賦此奉答（以下已酉作）

天涯爲客負芳晨。五嶺南來幾度春。適越豈容章甫士。登臺空弔老夫臣。夢回黃屋無真帝。淚灑朱崖有棄民。君是故游吾故國。東風愁說海揚塵。

來詩念及台北云昔曾游。

秋懷

蓬山淪沒阻東歸。看慣年年海水飛。剩有壺公教地縮。更無襄叔與天違。簾簾落日神猿哭。苒苒秋風虜馬肥。今日秦庭非復昔。休將九頓拜無衣。秋城吹角夕陽斜。浪迹頻年寄海涯。拔後枯蘗心未死。劫中殘局着全差。無聊身世文爲戲。有例神州裔亂華。不信東籬仍故節。烏夷韋絃玷黃花。

三十登壇往事過。英雄兒女兩蹉跎。他鄉白髮愁邊滿。故國青山夢裏多。末劫文章龍起陸。孤星涕淚鵲填河。弓衣繡坼秋魂冷。休唱尊前舊楚歌。

春盡夜寄答實甫（以下庚戌辛亥作）

挂席春江未有期。東風潮信誤篙師。載鰲已歎沈三島。嬉鳳安能隨九夷。精衛淚枯填海石。蚩尤魂化竟天旗。連夕
禁見荒唐山鬼前知事，雖卜何人問越祠。

自題三十登壇照片

十六年前弄少年。當時赤手欲回天。誓師雷雨窮荒外。開國河山落照邊。往事已憐成過電。雄姿未稱畫凌煙。于今不作登壇夢。漁鼓聲中號散仙。

中華民國三十六年三月初版

丘倉海先生念台詩集

△白報紙本定價七角整▽

版權所有
不准翻印

編者 丘念台

校訂者 鄒魯

發行者 獨立出版社

南京：申家巷二十一號

代表人 盧建曾

印刷者 獨立出版社

經售處

獨立出版社各地分社
全國各大書局

85
121082



1000-